

## **W u s t a w k i**

### **Założby za serbski lud k spożčenju Myta Ćišinskeho a Spěchowanskeho myta Ćišinskeho**

Wopominajo Jakuba Barta-Ćišinskeho, kotremuž so Założba za serbski lud winowata čuje, matej so

#### **Myto Ćišinskeho a Spěchowanske myto Ćišinskeho**

spožćeć.

#### **Preambla**

Z Mytom Ćišinskeho maja so wusahowace wukony na polu serbskeje kultury, wumělstwa abo wědomosće hódnoćić a ze Spěchowanskim mytom Ćišinskeho wjелеlubjace započatki w tutych wobłukach spěchować.

Myto Ćišinskeho a Spěchowanske myto Ćišinskeho so kóždy druhe lěto zwjetša wokoło 16. oktobra, k posmjertninam Ćišinskeho, na městnje w serbskim sydlenkim rumje Swobodneho stata Sakska abo w namrěтым sydlenkim rumje Serbow Kraja Braniborska spožčitej.

#### **Artikl 1**

Myto Ćišinskeho dotěruje so z 12.000,- eurami, Spěchowanske myto Ćišinskeho ze 4.000,- eurami.

Wobě myće spožčitej so z wopismom a čestnej jehłu z podobiznu Ćišinskeho.

#### **Artikl 2**

Myto Ćišinskeho spožči so njedźělene wosobinje abo skupinje wosobinow, kotrejež dołholětne skutkowanje steji w duchownej tradiciji Ćišinskeho a kotraž je za serbsku kulturu, wumělstwo abo wědomosć wusahowace džěło zdokonjała.

Myto spožči so wosobinje abo skupinje wosobinow jenož jónu.

#### **Artikl 3**

Spěchowanske myto Ćišinskeho spožči so njedźělene wosobinje abo skupinje wosobinow, kotraž je kedźbyhódne kreatiwne wukony we wobłuku serbskeje kultury, wumělstwa abo wědomosće docpěła. Z tym ma so dalše wuwowanje jeje zamóžnosćow podpěrować.

Myto spožči so wosobinje abo skupinje wosobinow jenož jónu.

#### **Artikl 4**

Myto Ćišinskeho a Spěchowanske myto Ćišinskeho so zjawnje njewupisatej. Njeje móžno, so wo myće požadać.

#### **Artikl 5**

Wo spožčenju Myta Ćišinskeho a Spěchowanskeho myta Ćišinskeho rozsudza kuratorij, kiž zestaja so z předsydku/předsydu Założboweje rady Założby za serbski lud a zastuperjow naslědnje mjenowanych nadregionalnje w serbskim sydlenkim rumje Swobodneho stata

Sakska a w namrětym sydlenskim rumje Serbow Kraja Braniborska skutkowacych serbskich towarstwow:

1. zastupjer(ka) Domowiny z. t. z Hornjeje Łužicy
2. zastupjer(ka) Domowiny z. t. z Delnjeje Łužicy
3. zastupjer(ka) Zwjazka serbskich wumělcow z. t.
4. zastupjer(ka) Zwjazka serbskich spěwarskich towarstwow z. t.
5. zastupjer(ka) Maćicy Serbskeje z. t.
6. zastupjer(ka) delnjoserbskeho wotdźěla Maćicy Serbskeje z. t.
7. zastupjer(ka) Serbskeho šulskeho towarstwa z. t.
8. zastupjer(ka) Zwjazka serbskich studowacych

Předsydstwo kuratorija přewozmje předsydka/předsyda Załožboweje rady.

Mjenowane towarstwa pomjenuja zastupjerja(ku) w kuratoriju na jednu wólbnu dobu (šěsć lět). Znowapomjenowanje wosoby je jenož we wopodstatnjenych wuwzačnych padach a jenož jónu móžno.

Zastupjerjow serbskich towarstwow w kuratoriju Załožbowa rada na spočatku wólbneje doby wobkrući. Po wotchadže člona kuratorija ma so hač do kónca wólbneje doby wot delegowacych towarstwow naslědnik postajić a wot Załožboweje rady wobkrućić.

#### **Artikl 6**

Kuratorij rozsudža wo spožčenju Myta Čišinskeho a Spěchowanskeho myta Čišinskeho kaž tež wo terminje a městnosći swjatočnosće.

Wobě myće so jenož žiwym wosobinam spožčitej (rozsudny je termin wuzwolenskeho posedženja kuratorija). Čłonom kuratorija so myto njespožči.

Kuratorij rozsudža z jednorej wjetšinu hłosow. Při runosći hłosow rozsudža hłos předsydki/předsydy kuratorija.

Kuratorij dźěla na zakładže swójskeho jednanskeho porjada.

#### **Artikl 7**

Wuradźowanja kuratorija njejsu zjawne. Přećiwo rozsudam kuratorija njeje prawniske postupowanje móžne.

#### **Artikl 8**

Kuratorij móže z přihłosowanjom Załožboweje rady Załožby za serbski lud wustawki změnić.

#### **Artikl 9**

Wustawki je Załožbowa rada dnja 2. nowembra 1994 wobzamknyła a naposledk dnja 8. decembra 2020 změniła.

Wustawki nabudu z tutym rozsudom płaćiwosće. Runočasnje zhubja dotal płaćiwe wustawki, posledni króć změnjene dnja 18. junija 2013, swoju płaćiwosć.

Budyšin, dnja 08.12. 2020